



梅村集卷第四

七言古詩一

行路難

奉君乘鸞明月之美扇耶谿赤堇之寶刀莞荔桃  
笙之綺席陽阿激楚之洞簫丈夫得意早行樂歌  
舞任俠稱人豪舉杯一歌行路難酒闌鐘歇風蕭  
蕭

其二

長安巧工製名燈七龍五鳳光層層中有青熒之

朱火下有映徹之澄水游魚揚鬣肆瀉潏飛鳥奮  
翼思騫騰黑風吹來徧槐市狂花振落燒觚稜金  
吾之威不能禁鐵柱倒塌銅盤傾使人策馬不能  
去青燐鬼哭唯空城

其三

君不見無須將閭叫呼天賜錢請葬驪山邊父爲  
萬乘子黔首不得耕種咸陽田君不見金墉城頭  
高百尺河間成都弄刀戟草木萌芽殺長沙狂風  
烈烈吹枯骨人生骨肉那可保富貴榮華幾時好  
龍子作事非尋常奪棗爭梨天下擾金牀玉几不  
得眠一朝零落同秋艸

其四

愁思忽不樂乃上咸陽橋盤螭蹲獸勢相齧豁呀  
口鼻吞崩濤當時平明出萬騎馬蹄蹀躞何逍遙  
長安冠蓋一朝改紫裘意氣非吾曹柴車辟易伏  
道畔舍人辭去妻孥嘲人生太行起面前何必褒  
斜棧閣崎嶇高

其五

君不見南山松柏何葱菁於世無害人無爭斧聲  
丁丁滿崖谷不知其下何王陵玉箱夜出寶衣盡  
冬青葉落吹魚燈石馬無聲缺左耳豐碑倒折纏  
枯藤當時公卿再拜下車過今朝蔓草居人耕

其六

漢家身毒鏡大如八銖錢蒲桃錦囊雖黯澹盤龍  
婉轉絲結連云是宣皇母后物摩挲愛惜宮中傳  
土花埋沒今千年對此撫几長嘆息金張許史皆  
徒然

其七

君不見黃河之水從天來一朝乃沒梁王臺梁王  
臺成高崔嵬禁門平日車如雷千尺金堤壞百里  
巖城開君臣將相竟安在化爲白龜與黃能乃知  
水可亡人國昆明劫灰何如哉

其八

男兒讀書良不惡屈首殘編務穿鑿窮年矻矻竟  
無成徒使聲華受蕭索君不見王令文章今大進  
丘公官退才亦盡寂寂齋居自著書太玄奇字無

人問

其九

伏軾說人主談笑稱上客一見賜黃金再見賜白  
璧夜半宮中獨召見母弟通侯皆避席上殿批逆  
鱗下殿犯貴戚犀首進讒譖韓非受指摘夜走函  
谷關逡巡不能出君不見范雎折脇懲前事身退  
功成歸蔡澤

其十

君不見鄭莊洗沐從知交傾身置驛長安郊又不  
見任君談辭接後進冠蓋從游數百乘人生盛名  
致賓客失勢人情諒非昔年少停車莫掃門故人  
行酒誰離席

其十一

直諫好言事召見拜司隸彈劾中黃門鯁切無所  
避天子初見容謂是敢言吏以茲增感激居官厲  
鋒氣奏對金商門縛下都船獄髡頭徙朔方衆怒  
猶不足私劔揣其喉赤車再收族橫尸都亭前妻  
子不敢哭酒色作直都殺人藏頭畏尾徒碌碌

其十二

拔劍橫左膝噴目悲歌向坐客我初從軍縛袴褶  
手擊黃顰弓霹靂生來不識官家貴帶甲持兵但  
長揖驅馬來中原尚書奏功級前庭論爵賞後殿  
賜飲食烏巘家兒坐我上壞坐爭言多酒失御史  
彈文讀且糾待罪驚憂不敢出還君絳衲兩當衫  
歸去射獵終南山

其十三

平生俠游尚輕利劇孟爲兄灌夫弟使酒罵坐人  
探丸斫俗吏流血都市中追兵數十騎借問追者  
誰云是灞陵杜穉季抽矢弗射是故人兩馬相逢  
互交臂吾徒豈相厄便當從此逝泰山羊氏能藏  
跡北海孫公堪避世複壁埋名二十年赦書却下  
咸陽尉歸來故鄉無負郭破家結客成何濟

其十四

今我思出門圖作雒陽賈東游陳鄭北齊魯白璧  
一雙交王公明珠十斛買歌舞關中軺車方算緡  
高編峩峩下荆楚道阻淮南兵貨折河東估朝爲

倚頓暮黔婁乞食吹簫還故土

其十五

丈夫少年使絕域從行吏士交河卒布衣功拜甘  
泉侯獨護高車四十國蒲萄美酒樽中醉汗血名  
駒帳前立富貴歸故鄉上書乞骸骨漢使遮玉關  
不遣將軍入軍中夜唱行路難條支海上秋風急

其十六

西莫過金牛關懸崖鐵鎖猿猱攀南莫過惡道灘  
盤渦利石戈矛攢猩猩啼兮杜鵑叫落日青楓山  
鬼嘯篁竹深巖不見天我所悲兮在遠道

其十七

結帶理流蘇流蘇紛亂不能理當時羅帷鑒明月  
皎皎容華若桃李一自君出門深閨厭羅綺有人  
附書還君到長干里名都鶯花發皓齒知君眷眷  
嬋娟子太行之山黃河水君心不測竟如此寄君  
翡翠之鸚釵傳璣之墮珥勸君歸來且歡喜卧疾  
空床爲君起

其十八

吾將老焉惟糟丘裸身大笑輕王侯禮法之士憎  
如讐此中未得逍遙游不如飲一斗頽然便就醉  
執法在前無所畏君不見嵇生幽憤阮生哭箕踞  
狂呼不得意

8 永和宮詞

揚州明月杜陵花夾道香塵迎麗華舊宅江都飛  
燕井新侯關內武安家雅步纖腰初召入鈿合金  
釵定情日豐容盛鬢固無雙蹴鞠彈碁復第一上  
林花鳥寫生綃禁本鍾王點素毫楊柳風微春試

馬梧桐露冷暮吹簫 君王宵旰無歡思宮門夜  
半傳封事玉几金床少晏眠陳娥衛艷誰頻侍貴  
妃明慧獨承恩宜笑宜愁慰 至尊皓齒不呈微  
索問蛾眉欲蹙又溫存本朝家法脩清讌房帷久  
絕珍奇薦勅使惟追陽羨茶內人數減昭陽膳維  
揚服製擅江南小閣爐烟沉水含私買瓊花新樣  
錦自脩水遞進黃柑中宮謂得 君王意銀鑲不  
妬溫成貴早日艱難護大家比來歡笑同良娣奉  
使龍樓賈佩蘭往還偶失兩宮歡雖云樊嫵能辭



令欲得昭儀喜怒難綠綈小字書成印瓊函自署  
充華進請罪長教 聖主憐含辭欲得 君王慍

君王內顧恤傾城故劍還存敵體恩手詔玉人  
蒙詰問自來階下拭啼痕外家官拜金吾尉平生  
游俠多輕利縛客因催博進錢當筵便殺彈箏伎  
班姬才調左姬賢霍氏驕奢竇氏專涕泣微聞椒  
殿詔笑譚豪奪灞陵田有司奏削將軍俸貴人冷  
落宮車夢永巷傳聞去玩花景和門裏誰陪從天  
顏不憚侍人愁后促黃門召共游初勸官家佯不

應玉車早到殿西頭兩王最小牽衣戲長者讀書  
少者弟聞道羣臣譽定陶獨將多病憐如意豈有  
神君語帳中漫云王母降離宮巫陽莫救蒼舒恨  
金鎖彫殘玉筯紅從此 君王慘不樂叢臺置酒  
風蕭索已報河南失數州况經少子傷零落貴妃  
瘦損坐匡床慵髻啼眉掩洞房荳蔻湯溫冰簟冷  
荔支漿熱玉魚涼病不禁秋淚沾臆裴回自絕  
君王膝苔沒長門有夢歸花飛寒食應相憶玉匣  
珠襦啓便房薤歌無異葬同昌 君王欲製哀蟬

賦誅筆詞臣有謝莊頭白宮娥暗嘆蹙庸知朝露  
非爲福宮草明年戰血腥當時莫向西陵哭窮泉  
相見痛倉黃還向官家問永王幸免玉環逢喪亂  
不須銅雀怨興亡自古豪華如轉轂武安若在憂  
家族愛子雖添北渚愁外家已葬驪山足夜雨椒  
房陰火青杜鵑啼血濯龍門漢家伏后知同恨止  
少當年一貴人碧殿淒涼新木拱行人尚識昭儀  
塚麥飯冬青問茂陵斜陽蔓草埋殘壠昭丘松檟  
北風哀南內春深擁夜來莫奏霓裳天寶曲景陽

宮井落秋槐

8

琵琶行

并序

去梅村一里爲王太常烟客南園今春梅  
花盛開予偶步到此忽聞琵琶聲出於短  
垣叢竹間循牆側聽當其妙處不覺拊掌  
主人開門延客問向誰彈則通州白在湄  
子或如父子善琵琶好爲新聲須臾花下  
置酒白生爲予朗彈一曲迺先帝十七  
年以來事敘述亂離豪嘈淒切坐客有舊

中常侍姚公避地流落江南因言 先帝  
在玉熙宮中梨園子弟奏水嬉過錦諸戲  
內才人於暖閣齋鏤金曲柄琵琶彈清商  
雜調自河南寇亂天顏常慘然不悅無復  
有此樂矣相與哽咽者久之於是作長句  
紀其事凡六百二言仍命之曰琵琶行

琵琶急響多秦聲對山慷慨稱入神同時漾陂亦  
第一兩人矢志遭遷謫絕調王康並盛名崑崙摩  
詰無顏色百餘年來操南風竹枝水調謳吳儂里

人度曲魏良輔高士填詞梁伯龍北調猶存止弦  
索朔管胡琴相間作盡失傳頭誤後生誰知却唱  
江南樂今春偶步城南斜王家池館彈琵琶悄聽  
失聲叫奇絕主人招客同看花爲問按歌人姓白  
家住通州好尋覓袴褶新更回鶻裝虬鬚錯認龜  
茲客偶因同坐話 先皇手把檀槽淚數行抱向  
人前訴遺事其時月黑花茫茫初撥鴟弦秋雨滴  
刀劍相磨轂相擊驚沙拂面鼓沉沉砉然一聲飛  
霹靂南山石裂黃河傾馬蹄迸散車徒行鐵鳳銅

盤柱摧塌四條弦上烟塵生忽焉摧藏若枯木寂  
寞空城烏啄肉轆轤夜半轉伊啞嗚咽無聲貴人  
哭碎珮叢鈴斷續風水泉凍壑瀉淙淙明珠瑟瑟  
拋殘盡却在輕籠慢燃中斜抹輕挑中一摘溲慄  
颼颼潛肌骨銜枚鐵騎飲桑乾白草黃沙夜吹笛  
可憐風雪滿關山烏鵲南飛行路難獺嘯鼯啼山  
鬼語瞿塘千尺響鳴灘坐中有客淚如霰 先朝  
舊直乾清殿穿宮近侍拜長秋咬春燕九陪游燕  
先皇駕幸玉熙宮鳳紙僉名喚樂工苑內水嬉

金僊偏殿頭過錦玉玲瓏一自中原盛豺虎煖閣  
才人撤歌舞插柳停搗素手箏燒燈罷擊花奴鼓  
我亦承明侍 至尊止聞鼓樂奏雲門段師淪落  
延年死不見 君王賜予恩 一人勞悴深宮裏  
賊騎西來趨易水萬歲山前鞞鼓鳴九龍池畔悲  
笳起換羽移宮總斷腸江村花落聽霓裳龜年哽  
咽歌長恨力士淒涼說上皇前輩風流最堪羨明  
時遷客猶嗟怨卽今相對苦南冠昇平樂事難重  
見白生爾盡一杯酒繇來此伎推能手岐王席散

少陵窮五陵召客君知否獨有風塵潦倒人偶逢  
絲竹便沾巾江湖滿地南鄉子鐵笛哀歌何處尋

8

雒陽行

詔書早洗雒陽塵叔父如王有幾人 先帝玉符  
分愛子西京銅狄泣王孫白頭宮監鋤荆棘曾在  
華清內承直遭亂城頭烏夜啼四十年來事堪憶  
神皇倚瑟楚歌時百子池邊嫋柳絲早見鴻飛  
四海翼可憐花發萬年枝銅扉未啓牽衣諫銀箭  
初殘淚如霰幾年不省公車章後來數罷昭陽宴

骨肉終全異母恩功名徒付上書人貴彊無取諸  
侯相調護何關老大臣萬歲千秋相訣絕青雀投  
懷玉魚別昭丘烟草自蒼茫湯殿香泉暗嗚咽析  
圭分土上東門寶轂雕輪九陌塵驪山西去辭溫  
室渭水東流別任城少室峰頭寫桐漆靈光殿就  
張琴瑟願王保此黃髮期誰料遭逢黑山賊嗟乎  
龍種誠足憐母愛子抱非徒然江夏漫裁脩柏賦  
東阿徒詠豆萁篇我朝家法踰前制兩宮父子無  
遺議廷論繇來責佞夫國恩自是優如意萬家湯

沐啓周京千騎旌旗給羽林總爲先朝憐白象豈  
知今日誤黃巾鄒枚客館傷狐兔燕趙歌樓散烟  
霧茂陵西築望思臺月落青楓不知路 今皇興  
念總帷哀流涕黃封手自裁殿內遂停三部伎宮  
中爲設八關齋束薪流水王人戍太牢加璧通侯  
祭 帝子魂歸南浦雲玉妃淚灑東平樹北風吹  
雨故宮寒重見新王受詔還唯有千尋舊松栝照  
人落落嵩高山

宮扇

補

宣皇清暑幸離宮碧檻青疏十二重七寶鑄銅薰  
鴨貴千金磁翠鬪雞紅玳瑁簾開南內宴沉香匣  
啓西川扇蟬翼描來雲母輕冰紈製就天孫艷丹  
霞滃起駕雲輶王母雙成絳節還玉管鳳銜花萬  
壽銀濤龍蹴海三山芙蓉水殿琉璃徹內家尚苦  
櫻桃熟九華初御詠招涼落葉迴風若霜雪峨眉  
萬里尚方船雉尾千秋奏御箋公主合歡嬌翡翠  
昭容反影鬪嬋娟遭逢召見南薰殿 思陵日昃  
猶揮汗 天語親傳賜近臣先生進講幽風倦黃

羅帕捧出雕闌画筵丹青掌上  
看俸薄買嫌燈市價恩深  
攜謝閣門班自離卷握秋風  
惡寒驢便面誰人識聞道烽  
烟蔽錦城齊紈楚竹無顏色  
石榴噴火照皇都再哭蒼梧  
媿左徒舊內謾懸長命縷  
新宮徒貼辟兵符雨夜床頭  
搜廢篋摩挲老眼王家物半  
面猶存蛺蝶圖空箱尚記霓  
裳疊蠹粉黃侵瓊樹花麴塵  
香損紫鸞車珠衣五翟悲秦  
女玉墜雙魚泣漢家莫嘆君  
恩長斷絕比來舒卷仍鮮  
潔乍可襟披宋玉風不堪袖  
掩班姬月

宣宗御用戩金蟋蟀盆歌

宣宗在御昇平初便殿進覽  
幽風圖煖閣才人籠蟋蟀晝  
長無事爲歡娛定州花甕賜  
湯沐玉粒瓊漿供飲啄戩金  
髹漆隱雙龍果厥雕盆錦香  
褥伏飛着翅逞腰身玉砌軒  
髻試一鳴性不近人須耿  
介才堪却敵在僥輕 君王暇  
豫留深意棘門霸上皆兒戲  
鬪雞走狗謾成功今日親觀  
戰場利坦頽長身張兩翼鋸  
牙植股鬚如戟漢家十二羽  
林郎蟲達封侯功第一臨淮  
真龍起風雲二豪螟蛉

張與陳草間竊伏竟何用竈下廝養非吾羣大將  
中山獨持重却月城開立不動兩目相當振臂呼  
先聲作勢多操縱應機變化若有神僂突彷彿常  
開平黃鬚鱗甲見股栗垂頭折足亡精魂獨身跳  
免追且急拉折攀翻只一擲螭螭塞外蠕蠕走使  
氣窮搜更深入當前拔柵賭先登奪采爭籌爲主  
人自分一身甘瓦注不知重賞用黃金 君王笑  
謂當如此楚漢雌雄何足齒莫嗤超距浪輕生橫  
草功名須致死二百年來無英雄故宮瓦礫吟秋  
風一寸山河鬪蠻觸五千甲士化沙蟲灌莽微軀  
亦何有捉生誤落兒童手蟻賊穿墉負敗齒戰骨  
雖香嗟速朽涼秋九月長安城黑鷹指爪愁雙睛  
錦鞬玉繚競馳逐頭鵝宴上爭輸贏鬪鴨欄空舞  
馬死開元萬事堪傷心秘閣圖書遇兵火厰盒宣  
窰賤如土名都百戲少人傳貴戚千金向誰賭樂  
安孫郎好古癖剔紅填漆收藏得我來山館見雕  
盆蟋蟀秋聲增歎息嗚呼漆城蕩蕩空無人哀螿  
切切啼王孫貧士征夫盡流涕惜哉不遇飛將軍



聽女道士卞玉京彈琴歌

鴛鴦逢天風北向驚飛鳴飛鳴入夜急側聽彈琴  
聲借問彈者誰云是當年卞玉京玉京與我南中  
遇家近大功坊底路小院青樓大道邊對門却是  
中山住中山有女嬌無雙清眸皓齒垂明璫曾因  
內宴直歌舞坐中瞥見塗鴉黃問年十六尚未嫁  
知音識曲彈清商歸來女伴洗紅粧枉將絕技矜  
平康如此纔足當侯王萬事倉皇在南渡大家幾  
日能枝梧詔書忽下選蛾眉細馬輕車不知數中  
山好女光徘徊一時粉黛無人顧艷色知爲天下  
傳高門愁被旁人妬盡道當前黃屋尊誰知轉盼  
紅顏誤南內方看起桂宮北兵早報臨瓜步聞道  
君王走玉驄犢車不用聘昭容幸遲身入陳宮  
裏却早名填代籍中依稀記得祁與阮同時亦中  
三宮選可憐俱未識君王軍府抄名被驅遣漫詠  
臨春瓊樹篇玉顏零落委花鈿當時錯怨韓擒虎  
張孔承恩已十年但教一日見天子玉兒甘爲東  
昏死羊車望幸阿誰知青塚淒涼竟如此我向花

間拂素琴一彈三嘆爲傷心暗將別鵠離鸞引寫  
入悲風怨雨吟昨夜城頭吹箏築教坊也被傳呼  
急碧玉班中怕點留樂營門外盧家泣私更裝束  
出江邊恰遇丹陽下渚船剪就黃緇貪入道攜來  
綠綺訴嬋娟此地繇來盛歌舞子弟三班十番鼓  
月明絃索更無聲山塘寂寞遭兵苦十年同伴兩  
三人沙董朱顏盡黃土貴戚深閨陌上塵吾輩漂  
零何足數坐客聞言起歎嗟江山蕭瑟隱悲笳莫  
將蔡女邊頭曲落盡吳王苑裏花

南生魯六真圖歌

并引

山東南生魯官浙之觀察命謝彬畫已像  
而劉復補山水凡六圖其一坐方褥聽兩  
姬搗箏吹洞簫其一焚香彈琴流泉瀉堦  
下旁一姬聽倦倚石一會兩少年蹴鞠戲  
毬擲空中勢欲落一圖書滿床公左顧笑  
有髻而秀者端拱榻前若受書狀則公子  
也餘二圖一則画藤橋橫斷壑中非人境  
公黃冠櫻拂掉首不顧一則深巖枯木有

頭陀趺坐披布衲卽公也予爲作六真圖  
歌鏡之石上覽者可以知其志矣

明湖夜雨天涯客握手停杯話疇昔人生竟作畫  
圖看拂卷生綃開數尺長身玉立於思翁美人促  
柱彈春風一聲兩聲玉簫急吹落碧桃無數紅笏  
有一姝嬌倚扇聽君手拂湘妃怨抱琴危坐鬚飄  
然知入清徽廣陵散出門逐伴車如風築毬會飲  
長安中歸來閉門閒課子石榻焚香列圖史我笑  
此翁何太奇彈琴蹴鞠皆能爲讀書終老豈長策

乘雲果欲鞭龍螭神仙吾輩儘可學六博吹笙游  
戲作不信晚年圖作佛趺坐蒲團貪睡着丈夫雄  
心竟若此世事悠悠何足齒興來展翫自掀髯櫻  
拂藤鞋自茲始劉君水石謝君圖解衣盤礴工揣  
摩平生嗜好經想像須臾點出雙清驢置身其間  
真快樂聲酒琴書資笑謔縱然仙佛兩無成如此  
溪山良不惡吾聞宗少文曾寫尚子平阮生長嘯  
逢蘇門祖孫妙筆多天真君不見興宗年少香山  
老不及丹青似舊人

後東臯草堂歌

君家東臯枕山麓百頃流泉浸花竹石田書畫數  
百卷酷嗜平生手藏錄隱囊塵尾寄蕭齋鴻鵠高  
飛鷹隼猜白社青山舊居在黃門北寺捕車來有  
詔憐君放君去重到故鄉棲隱處短策仍看屋後  
山扁舟却繫門前樹此時鈎黨雖縱橫終是君  
王折檻臣放逐縱緣當事意江湖還賴主人恩一  
朝龍去辭鄉國萬里烽烟歸未得可憐雙戟中丞  
家門帖淒涼題賣宅有子單居持戶難呼門吏怒  
索家錢窮搜廢篋應無計棄擲城南五尺山任移  
花藥鄰家植未剪松杉僧舍得漁舟網集習家池  
官道人牽到公石石礎雖留不記亭榿籬還在半  
無門欹橋已斷眠僵柳醉壁誰扶倚瘦藤尚有荒  
祠叢廢棘豐碑草沒猶堪識堦前田父早歌呼陌  
上行人增歎息我初扶杖過君家開尊九月逢黃  
花秋日溪山好圖畫石田真蹟深咨嗟傳聞此圖  
再易主同時賓客知存幾又見溪山改舊觀雕欄  
碧檻今已矣搖落深知宋玉愁衡陽雁斷楚天秋

斜暉有恨家何在極浦無言水自流我來草堂何處宿挑燈夜把長歌續十年舊事總成悲再賦閒愁不堪讀魏寢梁園事已空杜鵑寂寞怨西風平泉獨樂荒榛裏寒雨孤村聽暝鐘

汲古閣歌

嘉隆以後藏書家天下毘陵與瑯琊整齊舊聞收放失後來知誰及比聞充棟虞山翁里中又得小毛公搜求遺逸懸購繕寫精能鏤板工繇來斯事推趙宋歐虞楷法看飛動集賢院印校讐

精太清樓本裝潢重損齋手跋爲披圖蘇氏題觀在直廬館閣百家分四庫巾箱一幅盡三都本朝儒臣典制作累代縹緗輸秘閣徐廣雖編石室書孝徵好竊華林略兩京太學藏經史奉詔重脩賜金紫高齋學士費冷錢故事還如寫黃紙釋典流傳自洛陽中官經廠護焚香諸州各請名山藏總目難窺內道場南湖主人爲嘆息十年心力恣收拾史家編輯過神堯律論流通到羅什當時海內多風塵石經馬矢高丘陵已壞書囊縛作袴復驚

木冊摧爲薪君家高閣偏無恙主人留宿傾家釀  
醉來燒燭夜攤書雙眼摩挲覺神王古人關書借  
三館羨君自致五千卷又云獻書輒拜官羨君帶  
索躬耕田伏生藏壁遭書禁中郎秘惜矜談進君  
獲奇書好示人雞林巨賈爭摹印讀書到死苦不  
足小學雕蟲置廢麓君今萬卷盡刊訛邢家小兒  
徒碌碌客來詩酒話生平家近湖山擁百城不數  
當年清秘閣亂離踪跡似雲林

送志衍入蜀

去年秋山好君走燕雲道今年春山青君去錦官  
城秋山春山何處可爲別把酒欲問橫塘月人影  
將分花影稀鐘聲初動簫聲咽我昔讀書君南樓  
夜寒擁被譚九州動足下床有萬里駑馬伏櫪非  
吾儔當時東國賤男子傲岸平生已如此今朝乘  
傳下西川賓戶巴人負弓矢黃牛喘怒溼銀濤崩  
剝蒼崖化迹勞石斷忽穿風雨過山深日見魚龍  
高江頭老槎偃千尺接手猿猱擲橡栗雲移斷壁  
層波見月上危灘遠峰出縹緲樓臺白帝城月明

吹角唱花卿棧連子午愁烽堠水落東南洗甲兵  
摩訶池上清明火蹲鴟山下巴渝舞豈有居人浣  
百花依然風俗輸銅鼓有日登臨感客游楚天飛  
夢入江樓五湖歸思蒼波濶十月懷人木末愁別  
時曾折閨門柳相思應寄郢筒酒末下鹽鼓誰共  
嘗蜀中蒟醬君知否愧予王粲老江潭愁絕空山  
響杜鵑乞我讓西園數畝依君好種灌溪田

清風使節圖吾郡先達徐仲山中丞以武部  
郎奉命封鄭藩當時諸賢贈行作也中丞於  
先叅政爲同年勿齋先生屬予記其事勿齋  
勅使益府予亦有大梁之役兩家子弟述先  
志揚祖德其同此君歲寒矣

豫章夾日吟高風歲久蟠根造物功吾祖 先朝  
豫州牧早年納節東溪翁舅家仲珪擅画竹歸老  
山莊看亦足至今遺墨滿縹緗掛我青溪草堂曲  
此圖念出同年生當時意氣稱徐卿非買玉環思  
適鄭暫持翠節解司兵吾祖一麾方出守不獲諸  
公同載酒把臂曾看韋曲花贈行不及漳河柳誰

人尺幅寫篋管影入清郎四牡裝千里故園存苦  
節百年舊澤養新篁 今皇命使臨江右絳旛人  
識中丞後江左龍孫篠簜長淇園鳳質琅玕瘦嶰  
谷千尋鸞鳥呼彭城一派雨風多願將十丈鵝溪  
絹再作青青玉筍圖

梅村集卷第四 終

梅村集卷第五

七言古詩二

○ 東萊行 為姜如農如  
須兄弟作也

漢皇策士天人畢二月東巡臨碣石獻賦凌雲魯  
兩生家近蓬萊看日出仲孺召入明光宮補過拾  
遺稱侍中叔子輜軒四方使一門二妙傾山東同  
時里人官侍從左徒宋玉 君王重就中最數司  
空賢三十孤卿需大用君家兄弟俱承恩感時危  
涕長安門侍中叩閣數彊諫上書對仗彈平津天



顏不憚要人怨衛尉捉頭掙下殿中旨傳呼赤棒  
來血裏朝衫路人看愛弟棄官相追從避兵盡室  
來江東本爲逐臣溝壑裏却因奉母亂離中三年  
流落江湖夢茂陵荒草西風慟頭顱雖在故人憐  
髀肉猶爲舊君痛我來扶杖過山頭把酒論文遇  
子由異地客愁君更遠中原同調幾人留司空平  
昔耽佳句千首詩成罷官去戰鼓東來白骨寒二  
勞山月魂何處左氏勳名照汗青過江忠孝數中  
丞孺卿也向龍沙死柴市何人哭子卿只君兄弟  
天涯客漂零尚是烟霜隔思歸詩寄廣陵潮憶弟  
書來虎丘石回首風塵涕淚流故鄉蕭瑟海天秋  
田橫島在魚龍冷樂大城荒草木愁當日竹宮從  
萬騎祀日歌風何意氣斷碑年月記乾封柏梁侍  
從誰承制魯連蹈海非求名鴟夷一舸寧逃生丈  
夫淪落有時命豈復悠悠行路心我亦滄浪釣船  
繫明日隨君買山住

。 鴛湖曲

鴛鴦湖畔草粘天二月春深好放船柳葉亂飄千

尺雨桃花斜帶一溪烟烟雨迷離不知處舊堤却  
認門前樹樹上流鶯三兩聲十年此地扁舟住主  
人愛客錦筵開水閣風吹笑語來畫鼓隊催桃葉  
伎玉簫聲出柘枝臺輕靴窄袖嬌粧束脆管繁弦  
競追逐雲鬟子弟按霓裳雪面參軍舞鸚鵡酒盡  
移船曲榭西滿湖燈火醉人歸朝來別奏新翻曲  
更出紅粧向柳堤歡樂朝朝兼暮暮七貴三公何  
足數十幅蒲帆幾尺風吹君直上長安路長安富  
貴玉驄嬌侍女薰香護早朝分付南湖舊花柳好  
留烟月伴歸橈那知轉眼浮生夢蕭蕭日影悲風  
動中散彈琴竟未終山公啓事成何用東市朝衣  
一旦休北邙坏土亦難留白楊尚作他人樹紅粉  
知非舊日樓烽火名園竄狐兔画閣偷窺老兵怒  
寧使當時沒縣官不堪朝市都非故我來倚棹向  
湖邊烟雨臺空倍惘然芳草乍疑歌扇綠落英錯  
認舞衣鮮人生苦樂皆陳迹年去年來堪痛惜聞  
笛休嗟石季倫銜杯且效陶彭澤君不見白浪掀  
天一葉危收竿還怕轉船遲世人無限風波苦輸

與江湖釣叟知

項黃中家觀萬歲通天法帖

王氏勳名自始興後人書法擅精能江東將相傳  
家在翰墨風流天下稱前有瑯琊今樵李項氏由  
來堪竝美襄毅旂常戰伐高墨林書画聲名起當  
時海內號收藏秘閣圖書玉軸裝近代丹青推董  
巨名家毫素重鍾王鍾王妙蹟流傳舊貞觀在御  
窮搜購盡隨萬乘入昭陵人間一字無遺漏碑石  
猶存腕鋒出風摧雨剝吾文脫棗木鐫來波磔非  
淺麻榻就戈鋌失君家此書何處傳云是萬歲通  
天年則天酷嗜二王法詔求手迹千金懸從官方  
慶拜表進臣祖義獻與僧虔生平行草數十紙龍  
蛇盤蹙開天顏賜官五階帛百疋仍勅能手雙鉤  
填裝成用寶進御府不知何事流人間我思羲之  
負遠略北伐貽書料強弱惜哉徒令書画傳誓墓  
功名氣蕭索江東無事富山水興來灑筆臨池樂  
足知文采賴昇平父子優游擅家學只今海內無  
高門稽山越水烽烟作春風掛席由拳城夜雨君

齋話疇昨嗚呼吾友雅州公舒毫落紙前人同一  
官烏撒沒坏土萬卷青箱付朔風少伯湖頭鼙鼓  
動尚書第內烟塵空可憐累代圖書盡斷楮殘編  
墨林印此卷仍逃劫火中老眼縱橫看筆陣君真  
襄毅之子孫相逢意氣何相親卽看書画與金石  
訪求不屑辭家貧嗟乎世間奇物戀故  
緬傲絕倫

送徐次桓歸胥江草堂

春來放檝鴛湖游杉青插畔登高樓褐裘徐郎最  
年少坐中搖筆烟霞收裝隨到我海濱去雞黍流  
連別何遽云過胥江舊草堂乃父淒涼讀書處滄  
山突兀枕江濱伍相祠荒對夕曛我是故人同季  
子十年相識憶徐君只今孺子飄零客蘆中窮士  
無人識掛劍雖存舊業非吹簫未遇吾徒惜歸去  
還登漁父船南枝越鳥竟誰憐投金瀨在王孫泣  
白馬江聲遶舍邊

畫蘭曲

畫蘭女子年十五生小琵琶怨春雨記得糝成一

見時手撥簾帷便爾汝蜀紙當窓寫晚蘭口脂香  
動入毫端腕輕染黛添芽易釧重舒衫放葉難似  
能不能得花意花亦如人吐猶未珍惜沉吟取格  
時看人只道儂家媚橫披側出影重重取次腰肢  
向背同昨日一枝芳砌上折來雙鬢鏡臺中玉指  
纔停弄絃索漫攏輕調似花弱殷勤彈到別離聲  
雨雨風風聽花落花落亭臯白露溥舊根易土護  
新寒可憐明月河邊種移入東風碧玉欄聞道羅  
幃怨離索麝媒鵝絹開管作又云憔悴非昔時筆  
牀翡翠多零落今年掛楫洞庭舟柳暗桑濃菴綺  
樓度曲佳人遮鈿扇知書侍女下瓊鉤主人邀我  
圖山色宣索傳來画蘭筆輕移牙尺見勻牋側偃  
銀毫憐吮墨席上回眸惜雁箏醉中適口認魚羹  
茶香黯淡知吾性車馬雍容是故情常時對面憂  
吾瘦淺立斜窺訝依舊好將獨語過黃昏誰堪幽  
夢牽羅袖歸來開篋簡啼痕腸斷生綃點染真何  
似杜陵春襖飲樂游原上采蘭人

送杜公弢武歸浦口

將軍威名著關隴紫面虬髯鋒骨竦西州名士重  
人豪北地高門推將種起家二十便登壇氣壓三  
河震百蠻夜半旌旗度青海雪中笳鼓動蕭關當  
時海內稱劉杜死事忠勳君叔父黃砂磧上起豐  
碑李氏功名何足數君爲猶子有家風都護防秋  
杖節同白帝傳烽移劍外黃巾聞警出榆中功敗  
垂成謀不用十年心力堪悲痛只今天地滿風塵  
餘生淪落江南夢江南烟雨長菰蒲蟹舍魚莊家  
有無醉裏放歌衰髮短狂來搖筆壯心蘇自言少  
年好詩酒學佛求仙徧師友牀頭真訣幸猶在肘  
後陰符復何有嗟余憔悴卧江潭騎省哀傷初未  
久君來一見卽論文謂結婚姻商不朽蹉跎此意  
轉成空自恨愆期負若翁非是雋君辭霍氏終然  
丁椽感曹公此後相逢輒悲歎秦關何處鄉書斷  
苦憶江南欲住難羈棲老病無人看三經出塞五  
專征一卷詩書記姓名奴僕旌旄多甲第親朋兵  
火剩浮生重向天涯與我別憑欄把酒添淒咽烟  
水蘆花一雁飛回頭却望江南月

蘆洲行

江岸蘆洲不知里積浪吹沙長灘起云是徐常舊  
 賜莊百戰勳名照江水祿給朝家禮數優子孫萬  
 石未云酬西山詔許開煤冶南國恩從賜菽洲江  
 水東流自朝暮蘆花瑟瑟西風渡金戈鐵馬過江  
 來朱門大第誰能顧惜薪司按先朝冊勳產蘆洲  
 追籽粒已共田園沒縣官仍收子弟徵租入我家  
 海畔老田荒亦長蘆根豈賜莊州縣逢迎多妄報  
 排年賠累是重糧丈量親下稱蘆政鞭笞需索輕

人命胥吏交關橫派征差官恐喝難供應江南尺

土有人耕踏勘終無豪占情徒起再科民力盡却

虧全課國租輕積年升科老田本漕白重課指為無糧侵占故有重糧再科後重糧

去而定為蘆課視原額反少減矣甚言害民而又損國其無益如此詔書昨下知民

病解頭使用今朝定早破城中數百家蘆田白售

無人問休嗟百姓困誅求憔悴今看舊五侯只好

負薪煨馬矢敢誰伐荻上漁舟君不見舊洲已沒

新洲出黃蘆收盡江湖白萬束千車運入城草場

馬廐如山積樵蘇猶向鍾山去軍中日日燒陵樹

。捉船行

官差捉船爲載兵大船買脫中船行中船蘆港且  
潛避小船無知唱歌去郡符昨下吏如虎快槳追  
風搖急櫓村人露肘捉頭來背似土牛耐鞭苦苦  
辭船小要何用爭執洶洶路人擁前頭船見不敢  
行曉事篙師斂錢送船戶家家壞十千官司查點  
候如年發回仍索常行費另派門攤云雇船君不  
見官舫嵬峩無用處打鼓插旗馬頭住

馬草行

秣陵鐵騎秋風早廐將圉人索芻藁當時磧北起  
蒲梢今日江南輸馬草府帖傳呼點行速買草先  
差人打束香芻堪秣飽驂騮不數西涼誇苜蓿京  
營將士導行錢解戶公攤數十千長官除頭吏乾  
沒自將私價僦車船苦差常例須應免需索停留  
終不遣百里曾行幾日程十家早破中人產半路  
移文稱不用歸來符取重裝送推車挽上秦淮橋  
道遇將軍紫騮鞚轅門芻豆高如山長衫沒髀看  
奚官黃金絡頸馬肥死忍令百姓愁饑寒回首當



年開僕監龍媒烙字麒麟院天閑轡逸起黃沙游  
牝三千滿行殿蔣山南望獵痕燒放牧秋原見射  
鷗寧莖雕胡供伏櫪不堪極目草蕭蕭

題志衍所畫山水

畫君故園之書屋午榻茶烟蒔花竹著我溪邊岸  
葛巾十年笑語連床宿畫君蜀道之艱難去家萬  
里誰能還戎馬千山西望哭杜鵑落月青楓寒今  
之此圖何者是黯澹蒼茫惟一紙想像雲山變滅  
中其人與筆寧生死我思此道開榛蕪東南画脈

多蕭疎君嘗展卷向予說得及荆關老輩無巫山  
巫峽好粉本一官大笑誇吾徒此行歸來掃素壁  
捫腹滿貯青城圖只今猶是江南樹憶得當時送  
行處楊柳青青葭菼邊雙槩搖君此中去

8。題蘇門高士圖贈孫徵君鍾元 容城人 孝廉

蘇門山水天下殊中有一人清且癯龐眉扶杖白  
髭鬚鶻冠野服談詩書定州城北滏水瀦白沙村  
畔為吾廬少年蹀躞千金駒獻策 天子來皇都  
腰鞬三矢玉鹿盧幽州臺上為歡娛日暮酒酣登

徐無顧視同輩誰能如十人五人居要樞拖金橫  
玉當朝趨今我不第胡爲乎有田一廛書百廚雞  
泉馬水吾歸歟七徵不起乘柴車當時猶是昇平  
餘一朝鐵騎城南呼長刀斫背將人驅里中大姓  
高門間鞭笞不得留須臾叩頭莫敢爭高腴乞爲  
佃隸租請輸牽翁擔子立兩衢問言不荅但歛歔  
先生閉門出無驢僵卧一榻絕朝餽弟子二人舁  
籃輿百門書院今空虛此中間是孫登居太行秀  
色何盤紆橙楠榛栗松杉儲風從中來十萬株嘯  
臺遺址烟霞俱流泉百道穿堦除幅巾短髮不用  
梳彈琴橫卷心安舒微言妙旨如貫珠考鐘擊磬  
吹笙竽古文屋壁闡禹謨異人手授先天圖談仁  
講義追堯夫後來姚許開榛蕪斯文不墜須吾徒  
誰傳此圖來江湖使我一見心踟躕卽今絕學誰  
能扶屈指耆舊堪嗟吁蘇門山下有碩儒中原學  
者多沾濡百年文獻其存諸我往從之歌黃虞

壽總憲龔公芝麓

丈夫四十致卿相努力公孤方少壯握手開尊話

疇昔故人一見稱無恙當初海內苦風塵解褐才  
名便絕倫官守蘄春家近楚賊窺江夏路通秦書  
生年少非輕敵擐甲開門便迎擊詩成橫槊指黃  
巾戰定磨崖看赤壁我同宋玉適來游多士名賢  
共校讐此地異才爲亂出論文高話鎖廳秋別後  
相思隔江水黑山鐵騎如風雨聞道黃州數被兵  
讀書長嘯重圍裏荏苒分飛十八年我甘衰白老  
江邊那知風雪嚴城鼓重謁三公祭戟前卽君致  
身已鼎足正色趨朝勤補牘異書捫腹五千卷美  
酒開顏三百斛月明歌舞出簾櫳刻燭分題揮灑  
中談笑阮生青眼客文章王椽黑頭公却思少小  
經離亂銅駝荆棘尋常見側身天地竟何心過眼  
風光有誰羨楚水吳山思不禁朝衫欲脫主恩  
深待看賀監歸來歲勾漏丹砂本易尋

王郎曲

王郎十五吳趨坊覆額青絲白晳長孝穆園亭常  
置酒風流前輩醉人狂同伴李生柘枝鼓結束新  
翻善財舞鎖骨觀音變現身反腰貼地蓮花吐蓮

花婀娜不禁風一斛珠傾宛轉中此際可憐明月  
夜此時脆管出簾櫳王郎水調歌緩緩新鶯嘹唳  
花枝暖慣拋斜袖卸長肩眼看欲化愁應懶摧藏  
掩抑未分明拍數移來發曼聲最是轉喉偷入破  
帶人腸斷臉波橫十年芳草長洲綠主人池館惟  
喬木王郎三十長安城老大傷心故園曲誰知顏  
色更美好瞳神剪水清如玉五陵俠少豪華子甘  
心欲爲王郎死寧失尚書期恐見王郎遲寧犯金  
吾夜難得王郎暇坐中莫禁狂呼客王郎一聲聲

頓息移牀欹坐看王郎都似與郎不相識往昔京  
師推小宋外戚田家舊供奉只今重聽王郎歌不  
須再把昭文痛時世工彈白翎雀婆羅門舞龜茲  
樂梨園子弟愛傳頭請事王郎教弦索耻向王門  
作伎兒博徒酒伴貪歡謔君不見康崑崙黃幡綽  
承恩白首華清閣古來絕藝當通都盛名肯放優  
閒多王郎王郎可奈何

王郎名稼字紫稼於勿齋  
徐先生二株園中見之髫

而哲明慧善歌今秋遇于京師相去已十六七載  
風流儇巧猶承平時故習酒酣一出其伎坐上爲  
之傾靡余此曲成合肥龔公芝麓口占贈之曰薊  
苑霜高舞柘枝當年楊柳尚如絲酒闌却唱梅村

曲腸斷王  
郎十五時

楚兩生行 并序

蔡州蘇崑生維揚柳敬亭其地皆楚分也  
而又客於楚左寧南駐武昌柳以談蘇以  
歌爲幸舍重客寧南沒於九江舟中百萬  
衆皆奔潰柳已先期東下蘇生痛哭削髮  
入九華山久之出從武林汪然明然明亡  
之吳中吳中以善歌名海內然不過嘽緩  
柔曼爲新聲蘇生則於陰陽抗墜分判比

度如崑刀之切玉叩之栗然非時世所爲  
工也嘗遇虎丘廣場大集生睨其旁笑曰  
某郎以某字不合律有識之者曰彼僮楚  
乃竊言是非思有以挫之間請一發聲不  
覺屈服顧少年耳剽日久終不肯輕自貶  
下就蘇生問所長生亦落落難合到海濱  
寓吾里蕭寺風雪中以余與柳生有雅故  
爲立小傳援之以請曰吾浪跡三十年爲  
通侯所知今失路憔悴而來過此惟願公

一言與柳生並傳足矣柳生近客於雲間  
帥識其必敗苦無以自脫浮湛敖弄在軍  
政一無所關其禍也幸以免蘇生將渡江  
余作楚兩生行送之以之寓柳生俾知余  
與蘇生游且爲柳生危之也

黃鵠磯頭楚兩生征南上客擅縱橫將軍已沒時  
世換絕調空隨流水聲一生拄頰高談妙君卿唇  
舌淳于笑痛哭長因感舊恩詼嘲尚足陪年少途  
窮重走伏波軍短衣縛袴非吾好抵掌聊分幕府

金裘裳自把江村釣一生嚼徵與含商笑殺江南  
古調亡洗出元音傾老輩疊成妍唱待君王一絲  
縈曳珠盤轉半黍分明玉尺量最是大堤西去曲  
累人腸斷杜當陽憶昔將軍正全盛江樓高會誇  
名勝生來索酒便長歌中天明月軍聲靜將軍聽  
罷據胡牀撫髀百戰今衰病一朝身死豎降旛  
貔貅散盡無橫陣祁連高塚泣西風射堂賓客嗟蓬  
鬢羈棲孤館伴斜曛野哭天邊幾處聞草滿獨尋  
江令宅花開閒弔杜秋墳鴟絃屢換尊前舞鼉鼓

誰開江上軍楚客祇憐歸未得吳兒肯道不如君  
我念邗江頭白叟滑稽幸免君知否失路徒貽妻  
子憂脫身莫落諸侯手坎壈繇來爲盛名見君寥  
落思君友老去年來消息稀寄爾新詩同一首隱  
語藏名代客嘲姑蘇臺畔東風柳

茸城行

朝出胥門塘暮泊佘山麓旁帶三江襟扈瀆五茸  
城是何王築泖塔霜高稻葉黃澱湖雨過蓴絲綠  
百年以來誇勝事丹青圖卷高珠玉學士揮毫清

秘樓徵君隱几逍遙谷前輩風流書畫傳後生賢  
達聲華續給事才名矯若龍山公人地清如鵠汗  
簡銷沉又幾秋滄江屢建高牙纛不知何處一將  
軍到日雄豪炙手薰羊侃後房歌按隊陳稀賓客  
劍成羣刻金爲漏三更箭錯寶施牀五色文異物  
江淮嘗月進新聲京雒自天聞承恩累賜華林宴  
歸鎮高談橫海勳未見尺書收草澤徒誇名字得  
風雲此地江湖綰鎖鑰家擅陶朱戶程卓千箱布  
帛運輶車百貨魚鹽充邸閣將軍一一數高貲下

令搜牢徧墟落非爲仇家告併兼卽稱盜賊通囊  
橐望屋遙窺室內藏算緡似責從前諾敢信黔婁  
脫網羅早看猗頓填溝壑窟室飛觴傳箭催博場  
戲責橫刀索縱有名豪解折行可堪小戶勝狂藥  
將軍沉湎不知止箕踞當筵任頤指拔劍公收伍  
伯妻鳴髀射殺良家子江表爭猜張敬兒軍中思  
縛盧從史枉破城南十萬家養士何無一人死貪  
財好色英雄事若輩屠沽安足齒君不見夫差獵  
騎何翩翩五茸春草城南天雉媒飛起發雙矢西

施笑落珊瑚鞭湖山足紀當時勝歌舞猶爲後代  
傳陸生文士能爲將勳名三世才難量河橋雖敗  
事無成睥睨千秋肯誰讓代有文章占數公烟霞  
好處徧神王兵火燒殘萬卷空大節英聲未凋喪  
一朝遽落老兵手百里溪山復何有已見衣冠拜  
健兒苦無丘壑安窮叟茸城楊柳鬱娑娑欲繫扁  
舟奈晚何盤龍浦上行人少唳鶴灘頭戰艦多我  
望巖城聽街鼓鱸魚沽酒扣舷歌側身回視忽長  
笑此亦當今馬伏波



。贈吳錦雯兼示同社諸子

吾家季重才翩翩身長七尺虬鬚髯投我新詩百  
餘軸滿牀絹素生雲烟自言里中有三陸長衫拂  
髀矜豪賢弟先兄舉致身早我亦挾策遊長安其  
餘諸子俱嶽嶽感時上策愁祁連會飲痛哭岳祠  
下聞者大笑驚狂顛臯亭山頭金鼓震萬騎蹴踏  
東南天貽書訣別士龍死嗚呼吾友非高官餘或  
脫身棄妻子西興潮落無歸船我因老親守窮巷  
買山未得囊無錢息心掩關謝時輩五年不到西

溪邊比因訪客過山寺故人文酒相盤桓手君詩  
篇令我讀使我磊落開心顏豈甘不死愧良友欲  
使奇字留人間跳刀拍張雖將相有書一卷吾徒  
傳吾聞其語重歎息平生故舊空茫然不信扁舟  
偶乘興丁儀吳質追隨歡酒酣對客作長句十紙  
謾謾松風寒後來此會良不易况今海內多艱難  
安得與君結廬住南山著述北山眠

。蕭史青門曲

蕭史青門望明月碧鸞尾掃銀河濶好時池臺白

草荒扶風邸舍黃塵沒當年故后婕妤家槐市無人噪晚鴉却憶沁園公主第春鶯啼殺上陽花嗚呼 先皇寡兄弟天家貴主稱同氣奉車都尉誰最賢鞏公才地如王濟被服依然儒者風讀書妙得公卿譽大內傾官嫁樂安 光宗少女宜加意正值 官家從代來王姬禮數從優異先是朝廷啓未央天人寧德降劉郎道路爭傳長公主夫婿豪華勢莫當百兩車來填紫陌千金榼送出雕房紅窓小院調鸚鵡翠館繁箏叫鳳皇白首傳璣阿

母飾綠鞵大袖騎奴裝灼灼天桃共穠李兩家姊妹驕紈綺九子鸞雛鬪玉釵釵工百萬恣求取屋裏熏爐滃若雲門前鈿轂流如水外家肺腑數尊親 神廟榮昌主尚存話到孝純能識面抱來太子輒呼名六宮都講家人禮四節頻加戚里恩同謝面脂龍德殿共乘油壁月華門萬事榮華有消歇樂安一病音容沒莞蕩桃笙朝露空溫明祕器空堂設玉房珍玩宮中賜遺言上獻依常制却添駙馬不勝情 至尊覽表爲流涕金冊珠衣進太

妃鏡奩鈿合還夫婿此時同產更無人寧德來朝  
笑語真憂及四方宵旰甚自家兄妹話艱辛明年  
鐵騎燒宮闕君后倉黃相訣絕仙人樓上看灰  
飛織女橋邊聽流血慷慨難從鞏公死亂離怕與  
劉郎別扶攜夫婦出兵間改朔移朝至今活粉確  
脂田縣吏收糶樓舞閣豪家奪曾見天街羨璧人  
今朝破帽迎風雪賣珠易米返柴門貴主淒涼向  
誰說苦憶先皇涕淚漣長平嬌小最堪憐青萍  
血碧它生果紫玉魂歸異代緣盡嘆周郎曾入選  
俄驚秦女遽登仙青青寒食東風柳彰義門邊冷  
墓田昨夜西窓仍夢見樂安小妹重歡讌先后傳  
呼喚捲簾貴妃笑折櫻桃倦玉階露冷出官門御  
溝春水流花片花落回頭往事非更殘燈炮淚沾  
衣休言傅粉何平叔莫見焚香衛少兒何處笙歌  
臨大道誰家陵墓對斜暉只看天上瓊樓夜烏鵲  
年年它自飛

。董山兒

董山兒兒生不識亂與離父言急去牽兒衣母言

乞火爲兒炊作糜父母忽不見但見長風白浪高  
崔嵬將軍下一令軍中那得聞兒啼樓船何高高  
沙岸多崩摧榜人不能移舉手推墮之上有蒲與  
萑下有濘與泥十步九倒迷東西身無袴襦足穿  
蒺藜叩頭指口惟言飢將船送兒去問以鄉里記  
憶還依稀父兮母兮哭相認聲音雖是形骸非傷  
有一老翁羨兒獨來歸不知我兒何處餵游魚或  
經略賣遭鞭笞垂頭涕下何纍纍吾欲竟此曲此  
曲哀且悲茫茫海內風塵飛一身不自保生兒欲

何爲君不見董山兒

梅村集卷第五終

梅村集卷第六

七言古詩三

。送沈繹堂太史之官大梁

雲間學士推二沈布衣召見登華省多少金閨榜  
墨新科名埋沒聲華冷青史流傳有弟兄衣白山  
人披賜錦一代才名竝玉珂百年絹素垂金粉知  
君門胄本能文易世遭逢更絕倫射策紫裘臚唱  
出馬蹄不動六街塵曲江李杜無遺恨留取花枝  
待後人卽今藝苑多供奉八分草隸清曹重署額

新宮十丈懸韋郎體勢看飛動其餘作者何紛紛  
爭來待詔鴻都門圍棋賭墅王長史丹青畫馬曹  
將軍君也讀書致上第傳家翰墨閒遊戲迸落長  
空筆陣奇縱橫妙得先人意頓挫沉雄類壯夫雙  
瞳剪水清癯異卧疾蕭齋好苦吟平生雅不爲身  
計唯留詩句滿長安清切長宜禁近官秋雨直廬  
分手處忽攜書卷看嵩山嗚呼男兒不入卽當出  
生世諧爲二千石黃紙初除左馮翊腰間兩綬開  
顏色君不見沈侍中圖書秘閣存家風匹夫徒步

拜侍從况今淋漓 御墨宮袍紅一麾去聽梁園  
鐘軒車路出繁臺東杯酒意氣何雍容簿領豈足

羞英雄安能低眉折腰事鉛槧蹉跎白首從雕蟲

宣廟時雲間有大小沈學士以布衣善書入翰林  
皆著名跡大學士名度小學士名粲繹堂爲壬辰  
第三人官編脩擢授大梁  
道亦有書名小學士後也

8 通玄老人龍腹竹歌

通玄老人來何方碧臚頰面拳毛蒼手披地圖向  
我說指點西極天微茫視彼萬里若咫尺使我不  
得悲他鄉京師公卿誰舊識與君異國同周行九

州喪亂朋友盡此道不絕留扶桑床頭示我龍腹  
竹夜半風雨疑騰驤尾燒鱗蛻飛不得蒼皮倔强  
膺微張此中空洞亦何有得無領下驪珠藏漢家  
使者通大夏仍來邛蜀搜篋管更踰葱嶺訪異種  
攜歸上苑棲鸞皇我欲裁之作龍笛水底老蛟吟  
不得縱使長房投葛陂此龍僵卧難扶策可是天  
教產竹郎八荒奇事誰能識一從海上西南來中  
原篠簜多良材淇園已竭蒼生痛會稽正採征夫  
哀天留異質在無用任將拋擲生塵埃若有人兮  
在空谷束素娟娟不盈匊盡道腰肢瘦勝肥此君  
無乃非其族雪壓霜欺直幹難輪困偃蹇忘榮辱  
邴君豈出子魚下高人磊砢遭題目玉筍新抽漸  
拂雲摩挲自倚東墻曲苦節長同處士飢寬心好  
耐湘妃哭吁嗟乎崑崙以外流沙西當年老子驅  
青犢手中竹杖插成林殺青堪寫遺經讀君不見  
猶龍道德五千字要言無過寧爲腹何可一日無  
此竹

送舊總憲龔孝升以上林苑監出使廣東

與君對酒庾樓月君逼干戈我離別與君藉地燕  
山草君作公孤我潦倒亦知窮老應自疎識君意  
氣真吾徒門前車馬多豪俊躡衣上坐容衰鬢我  
持半勺君一斗我吟一篇君百首每逢高會輒盡  
歡把我新詩不容口今日他鄉再送君地角天涯  
復何有山川有靈交有命延津會合真難定如君  
共事曹侍郎百僚彈壓風裁正握手論文海內推  
交游京洛聲華盛秋風吹向越王臺後先踪跡誰  
能信不見蘭臺連柏府却過劍浦來珠郡相贈雖  
無陸賈金相看何必周昌印丈夫豁達開心期悠  
悠世上無人知三仕三已總莫問一貴一賤將奚  
爲別君勸君休失意碧水丹山暫遊戲客路扁舟  
好著書故園九日堪沉醉烏柏霜紅少婦樓枕椰  
雨黑行人騎獨有飄零老伏生不堪衰白困將迎  
祇因舊識當塗少坐使新知我輩輕花發羅浮夢  
君處躑躅悲歌不能去

8

雁門尚書行

并序

雁門尚書行爲大司馬白谷孫公作也公



代州人地故雁門郡長身伉爽才武絕人  
其用秦兵也將憑巖關爲持久且固將吏  
心秦士大夫弗善也累檄趣之戰不得已  
始出天淫雨糗糧不繼師大潰潼關陷獨  
身橫刀衝賊陣以沒從騎俱散不能得其  
屍公之出也自念必死顧語張夫人夫人  
曰丈夫報國耳無憂我西安破率二女六  
妾沉于井揮其八歲兒以去兒踰垣避賊  
墮民舍中有老翁者善衣食之二年公長

子世瑞重趼入秦得夫人屍貌如生老翁  
歸以弟相扶還見者泣下蓋公素有德秦  
人云余門人馮君訥生公同里人作潼關  
行紀其事余曾識公于朝因感賦此什公  
死而天下事以去然其敗由趣戰且大雨  
糧絕此固天意抑本廟謨未可專以責公  
也公之叅佐惟監軍道喬公以明經奏用  
能不負公潼關之破同日死名元柱定襄  
人

雁門尚書受專征登壇顧盼三軍驚身長八尺左  
右射坐上咄吒風雲生家居絕塞愛死士一日費  
盡千黃金讀書致身取將相關西鼠子方縱橫長  
安城頭揮羽扇臥甲韜弓不忘戰持重能收壯士  
心沉幾好待兇徒變忽傳使者上都來夜半星馳  
馬流汗覆轍寧堪似往年催軍還用松山箭尚書  
得詔初沉吟蹶起橫刀忽長歎我今不死非英雄  
古來得失誰由算椎牛誓衆出潼關墟落蕭條轉  
餉難六月炎蒸驅萬馬二喙風雨斷千山雄心慷

慨宵飛檄殺氣憑陵老據鞍掃箠謀成頻撫劔量  
沙力盡爲傳飡尚書戰敗追兵急退守巖關收潰  
卒此地乘高足萬全只今天險嗟何及蟻聚蜂屯  
已入城持矛瞋目呼狂賊戰馬嘶鳴失主歸橫尸  
撐距無能識烏鳶啄肉北風寒寡鶴孤鸞不忍看  
願逐相公忠義死一門恨血土花斑故園有子音  
書絕勾注烽烟路百盤欲走雲中穿紫塞別尋奇  
道訪長安長安到日添悲哽繭足荆榛見胥井轆  
轤繩斷野苔生幾尺枯泉浸形影永夜曾歸風露

清經秋不化冰霜冷，二女何年駕碧鸞。七姬無塚埋紅粉，復壁藏兒定有無。破巢窮鳥問將雛，時來作使千兵勢。運去流離六尺孤，傍人指點牽衣袂。相看一慟真吾弟，訣絕難爲老母心。護持始識遺民意，回首潼關廢壘高。知公于此葬蓬蒿，沙沉白骨魂應在。雨洗金瘡恨未消，渭水無情自東去。殘鴉落日藍田樹，青史誰人哭薜碑。赤眉銅馬知何處，嗚呼材官鐵騎看如雲。不降卽走徒紛紛，尚書養士三十載。一時同死何無人，至今唯說喬參軍。

贈馮訥生進士教授雲中

并州馮郎長吳越，桐江風雪秦淮月。不烹羊酪敵萼羹，肯拈蘆管吹桃葉。才同顧陸與溫邢，俠少風流擅絕倫。名士有誰甘作諾，丈夫何必尚專城。乞得一羶還故土，欲化邊人作鄒魯。余笑謂君且歸去，不信廣文今廣武。絳帳懸弓設豹侯，講堂割肉摻鼉鼓。擊磬新調塞上歌，投壺却奏軍中舞。文籍先生上谷儒，游閒公子河東賈。亂定初聞闕里鐘，時清不用平城弩。雁門太守解將迎，馬邑名豪通

訓詁烏桓年少挾雕弧射得黃羊供束脯男兒作  
健羞裙屐拂雲堆上吹橫笛低頭博士爲萬卷撫  
掌封侯空四壁憶昔扁舟醉石頭別來幾夢南徐  
客隱囊塵尾燒却盡長鋏純鈎看自惜學就吳趨  
恐未工注成晉問無人識嗚呼五湖烟水憶鱸魚  
落木天高好寄書塞雁不歸花又發故人消息待  
何如

雕橋莊歌

并序

高邑趙忠毅公爲雕橋莊記曰吾郡梁太

宰有雕橋莊在郡西十五里大茂諸山之  
東前臨滹沱西韓二水東爲大門表之曰  
尚書里有樓曰蓮渚仙居有堂曰壽槐槐  
可四十圍相傳數百年物太宰功成身退  
徜徉于此者二十年今其孫慎可讀書其  
中自號爲西韓生云此忠毅家居時所作  
也公後拜吏部尚書視梁公以同郡爲後  
繼竟因黨禍戍代州死慎可以孝廉入中  
翰余始識之知其爲趙公交尋以齟齬去

相別十餘年今起官水部家門蟬冕當代  
莫與比焉余以其名山別墅亂後獨全高  
門遺老晚節最勝雕橋盛事自太宰以來  
百餘年於此矣是可歌也爲作雕橋莊歌  
常山古槐千尺起雕橋西畔尚書里偃蓋青披大  
茂雲扶疎響拂韓河水水部山莊遶碧渠彈琴長  
嘯脩篁裏今年相見在長安據鞍却笑吾衰矣盡  
道新枝任棟梁不知老幹經風雨自言年少西韓  
生幽并豪俠皆知名酒酣箕踞聽鼓瑟射麋擊兔  
邯鄲城天生奇質難自棄一朝折節傾公卿當時  
海內推高邑趙公簡重稱相得才地能交大父行  
襟期雅負名賢識公曾過我讀書處笑倚南樓指  
庭樹歸田太宰昔同游廿載林泉共來去此是君  
恩優老臣後來吾輩應難遇每思此語輒泫然知  
已投荒絕塞天同是冢臣恩數異傷心非復定  
陵年黃巾從此成貽禍青史誰來問斷編鉤黨幾  
家傳舊業干戈何地着平泉我有山莊幸如故老  
樹吟風自朝暮磐石寧容蟲蟻穿斧斤不受樵蘇

誤鈴索高齋擁賜書名花異果雕欄護綠葯紅蕖  
水面開門前卽是鳴騶路子弟傳呼千騎歸不教  
鞍馬驚鷗鷺年年細柳與新蒲粧點溪山入畫圖  
四海烽烟喬木在一窓燈火故人無相逢只有江  
南客頭白尊前伴老夫

。海戶曲

南海子周環一百六十里有海戶千人

大紅門前逢海戶衣食年年守環堵收藁腰鎌拜  
嗇夫築場貫酒從樵父不知占籍始何年家近龍  
池海眼穿七十二泉長不竭御溝春暖自涓涓平

疇如掌催東作水田漠漠江南樂鴛鴦鷺鶯鶉滿烟

汀不枉人呼飛放泊

南海子有水泉七十處元之飛放泊也

後湖相

望築三山兩地神州咫尺間

以西苑後湖名海子故此云南

遂使

相如誇陸海肯教王母笑桑田蓬萊樓閣雲霞變

晾鷹臺上何王殿

晾鷹臺元之仁虞院也當使大學士提調之鷹墜皆用先朝舊

璽改

傳說新羅玉海青星眸雪爪飛如練

玉海青卽白鷹

也

詐馬筵開桐酒香

元有詐馬宴

割鮮夜飲仁虞院二

百年來話大都平生有眼何曾見頭白經過是舊

朝春深慣鎖黃山苑

叶

典守唯聞中使來樵蘇輒

假貧民便芳林別館百花殘廿四園中爛熳看海南

子有二十四園係明時制記得尚方初薦品東風鈴索護雕闌

葡萄滿摘傾筠籠蘋果新嘗捧玉盤賜出宮中公

主謝分遺闕下侍臣餐一朝剪伐生荆杞五柞長

楊悵已矣野火風吹螞蟻墳海子東南有螞蟻墳每清明日數萬皆聚

于枯楊月落蝦蟇水玉泉一名蝦蟇泉流入海子盡道千年苑

囿非忽驚萬乘車塵起雄圖開國馬蹄勞將相風

雲劍槊高帳殿行城三十里旌旗獵獵響鳴鞘朝

鮮使者奇毛進白鷹刷羽霜天勁舊跡凌歊好放

鵬荒臺百尺登臨勝俊鶻重經此地飛黑河講武

當年盛弔古難忘百戰心掃空雉兔江山淨新豐

野老驚心目縛落編籬守麋鹿兵火摧殘淚滿衣

昇平再覩脩茅屋衰草今成御宿園豫游只少千

章木上林丞尉已連催灑掃離宮補花竹人生陵

谷不須哀蘆葦陂塘雁影來君不見鄆杜西風蕭

瑟裏丹青早起濯龍臺

退谷歌贈同年孫公北海

我家乃在莫釐之下具區之東洞庭烟鬢七十二

天際杳杳聞霜鐘豈無巢居子長嘯呼赤松後來  
高臥不可得無乃此世非洪濛元氣茫茫鬼神鑿  
黃虞既沒巢由窮逆旅逢孫登自稱北海翁攜手  
共上徐無峰仰天四顧指而笑此下卽是宜春宮  
若教天子廣苑囿吾地應入甘泉中丈夫蹤跡  
貴狡獪何必萬里游崆峒君不見抱石沉焚山死  
被髮佯狂棄妻子匡廬峰成都市欲逃名姓竟誰  
是少微無光客星暗四皓衣冠只如此使我山不  
得高水不得深鳥不得飛魚不得沉武陵洞口聞  
野哭蕭斧斫盡桃花林仙人得道古來宅劫火到  
處相追尋不如三輔內此地依青門非朝非市非  
沉淪鄠杜豈關蕭相請茂陵不厭相如貧飲君酒  
就君宿羨君逍遙之退谷花好須隨禁苑開泉清  
不讓溫湯浴中使敲門爲放鷹羽林下馬因尋鹿  
我生亦胡爲白頭苦碌碌送君還山識君屋庭草  
彷彿江南綠客心歷亂登高日噫噉乎歸哉我家  
乃在莫釐之下具區之東側身長望將安從

贈文園公



君家丞相人中龍屈申時會風雲空廬陵忠孝兩  
賢繼待詔聲名累葉同致主絲綸三月罷傳家翰  
墨八分工汝父翩翩相公弟詞場跌宕酣聲伎才  
大非關書畫傳門高不屑公卿貴老向長安作布  
衣主知特達金門戲 先帝齋居好鼓琴相如召  
入賜黃金大絃張悉宮聲亂識是 君王宵肝心  
爲君旣難臣亦苦龜山東望思宗魯左徒憔悴放  
江潭忠愛惓惓不忘楚可惜吾家有逐臣曲終哀  
怨無人補欲譚治道將琴諫審音先取宮商辨怡

神玉几澹無爲雲門樂作南薰殿君臣朋友盡和  
平四海熙然致清晏 聖主聞聲念舊臣名家絕

藝嗟稱善歸來卧疾五湖雲垂死干戈夢故君綠  
綺暗塵書卷在春令原上戴顓墳雍門歌罷平陵  
曲報韓子弟幾湛族竺塢祠堂鬼火紅闐門池館  
蒼颯宿汝念先人供奉恩抱琴長向荒江哭滿目  
雲山入舊圖只今無地安茅屋誰將妙蹟享千金  
後人餒死空山麓與君五世通中表相國同朝悲  
宿草尋山結伴筍輿游汝父平生與我好看君才

調擅丹青画舫相逢話死生君不見信國悲歌青  
史裏古來猶子重家聲

画中九友歌

華亭尚書天人流墨花五色風雲浮 至尊含笑

黃金投殘膏剩馥鷄林求 玄宰 太常妙蹟兼銀鈎

樂郊擁卷高堂秋真宰欲訴窮雕搜解衣盤礴堪

忘憂 烟客 誰其匹者王廉州神姿玉樹三山頭擺

落萬象烟霞收尊彝斑剝探商周得意換却千金

裘 玄照 檀園著述誇前脩丹青餘事追營丘平生

書画置兩舟湖山勝處供淹留 長蘅 阿龍北固持

雙矛披圖赤壁思曹劉酒醉灑墨橫江樓蒜山月

落空悠悠 龍友 姑蘇太守今僧繇問事不省張兩

眸振筆忽起風颼颼連紙十丈神明道 爾唯 松圓

詩老通清謳墨莊自画歸田游一犁黃海鳴春鳩

長笛倒騎烏犍牛 孟陽 花龕巨幅千峰稠小景點

出林塘幽晚年筆力凌滄洲幅巾鶴髮輕王侯 潤

甫 風流已矣吾瓜疇一生迂癖爲人尤僮僕竊罵

妻孥愁瘦如黃鵠閒如鷗烟驅墨染何曾休 僧彌

。銀泉山

銀泉山下行人稀青楓月落魚燈微道旁翁仲忽  
聞語火入空墳燒寶衣五陵小兒若狐兔夜穴紅  
墻縣官捕玉椀珠襦散草間云是先朝鄭妃墓  
覆雨翻雲四十年專房共輦承恩顧禮數繇來母  
后殊至尊錯把旁人怒承直中宮侍宴迴血裹  
銀環不知數豈有言辭忤大家蛾眉薄命將身悞  
宮人斜畔伯勞啼聲聲爲怨驪姬訴盡道昭儀殉  
夜臺萬歲千秋共朝暮宮車一去不相隨當時枉

信南山錮只今雲母似平生皓齒明眸向誰妬選  
侍陵園亦已荒移宮事蹟更茫茫兩朝臺諫孤忠  
在一月昭陽舊恨長總爲是非留信史却憐恩寵  
異前王路人尚說東西李二李寢園亦在山下指點飛花入  
壞墻

8 田家鐵獅歌

田家鐵獅屹相向聃談蹲夷信殊狀良工朱火初  
寫成四顧咨嗟覺神王先朝異物徠西極上林金  
鎖攀楹出玉關罷獻獸圈空刻畫丹青似爭力武

安戚里起高門欲表君恩示子孫鑄就銘詞鐫  
日月天貽神獸守重闈第令監奴睛閃爍老熊當  
路將人攫不堪此子更當關鈎爪張眸吐銀鬣七  
寶香猊玉辟邪嬉游牽伴入侯家圉人新進天閑  
馬御賜仍名獅子花假面羗胡裝雜伎狡猊突出  
拳毛異跳擲聲聲画鼓催條支海上何繇致異材  
逸獸信超羣其氣無乃如將軍將軍豈是批熊手  
瞋目哮呼天下聞省中忽唱田蚡死青犢明年食  
龍子蝦蟇血灑上陽門三十六宮土花紫此時鐵  
獅絕可憐兒童牽挽誰能前橐駝磨肩牛礪角霜  
摧雨蝕枯藤纏主人已去朱扉改眼鼻塵沙經幾  
載鎖鑰無能護北門画圖何處歸西海吾聞滄洲  
鐵獅高數丈千年猛氣難凋喪風雷夜半戲人間  
柴皇戰伐英靈壯蘆溝城雉對西山橋上征人竟  
不還枉刻蹲獅七十二桑乾流水自潺潺秋風吹  
盡連雲宅鐵鳳銅鳥飛不得却羨如來有化城香  
林獅象空王力扶雀犇牛見太平月支使者貢西  
京并州精鐵終南冶好鑄江山莫鑄兵

8 題崔青蚓洗象圖

嗚呼顧陸不可作世間景物都蕭索雲臺冠劔半  
無存維摩寺壁全凋落開元名手空想像昭陵御  
馬通泉雀燕山崔生何好奇書画不肯求人知仙  
靈雲氣追恍惚宓妃雒女乘龍螭平生得意圖洗  
象興來掃筆開屏障赤罽如披洱海裝白牙似立  
含元仗當時 駕幸承天門鸞旗日月陳金根雞  
鳴鐘動雙闕下歸然不動如崑崙崔生布衣懷紙  
筆道衝騶哄金吾卒仰見天街馴象來歸去沉吟

思十日眼前突兀加摩挲非山非屋非陂陀昔聞  
阿難騎香象梅檀林內頻經過我之此圖無乃是  
貝多羅樹金沙河十丈黃塵向天闕霜天夜踏宮  
墻月芻豆支來三品料鞭梢趨就千官謁材大寧  
堪世人用徒使低頭受羈縲京師風俗看洗象玉  
河春水涓流潔赤脚烏蠻縛雙帚六街士女車填  
咽叩鼻殷成北闕雷怒蹄捲起西山雪圖成懸在  
長安市道旁觀者呼奇絕性癖難供勢要求價高  
一任名豪奪十餘年來人事變碧雞金馬爭傳箭

越人善象教象兵扶南身毒來酣戰惜哉崔生不  
復見画图未得開生面若使從軍使趙佗蒼梧城  
下看如練更作昆明象戰圖止須一疋鷲溪絹嗟  
嗟崔生餓死長安陌亂離荒草埋殘骨一生心力  
付兵火此卷猶存堪愛惜君不見 武宗供奉徐  
髯仙豹房夜直從游畋青熊蒼兕寫奇特 至尊  
催賜黃金錢只今零落同雲烟古來画家致身或  
將相丹青慘澹誰千年

松山哀

拔劍倚柱悲無端爲君慷慨歌松山盧龍蜿蜒東  
走欲入海屹然撐拄當雄關連城列障去不息茲  
山突兀烟峰攢中有壘石之軍盤白骨穿距凌巘  
岬十三萬兵同日死渾河流血增奔湍豈無遭際  
異變化須臾間出身憂勞致將相征蠻建節重登  
壇還憶往時舊部曲喟然歎息摧心肝嗚呼玄菟  
城頭夜吹角殺氣軍聲振寥廓一旦功成盡入關  
錦裘跨馬征夫樂天山回首長蓬蒿烟火蕭條少  
耕作廢壘斜陽不見人獨留萬鬼填寂寞若使山

川如此閒不知何事爭強弱聞道 朝廷念舊京  
詔書招募起春耕兩河少壯丁男盡三輔流移故  
土輕牛背農夫分部送雞鳴關吏點行頻早知今  
日勞生聚可惜中原耕戰人

臨淮老妓行

臨淮將軍擅開府不鬪身強鬪歌舞白骨何如棄  
戰場青娥已自成灰土老大猶存一妓師柘枝記  
得開元譜纔轉輕喉便淚流尊前訴出漂零苦妾  
是劉家舊主謳冬兒小字唱梁州翻新水調教桃

葉撥定鴟弦授莫愁武安當日誇聲伎秋娘絕藝  
傾時世戚里迎歸金犢車後來轉入臨淮第臨淮  
游俠起山東帳下銀箏小隊紅巧笑射棚分画的  
濃糝毬仗簇花叢縱爲房老腰肢在若論軍容粉  
黛工羊侃侍兒能走馬李波小妹解彎弓錦帶輕  
衫嬌結束城南挾彈貪馳逐忽聞京闕起黃塵殺  
氣奔騰滿川陸探騎誰能到薊門空閒千里追風  
足消息無憑訪兩宮兒家出入金張屋請爲將軍  
走故都一鞭夜渡黃河宿暗穿敵壘過侯家妓堂

仍訝調絲竹祿山裨將帶弓刀醉擁如花念奴曲  
倉卒逢人問二王武安妻子相持哭薰天貴勢倚  
椒房不爲 君王收骨肉翻身歸去遇南兵退駐  
淮陰正拔營寶劍幾曾求死士明珠還欲致傾城  
男兒作健酣杯酒女子無愁發曼聲可憐西風怒  
吹折山陽樹將軍自撤沿淮戍不惜黃金購海師  
西施一舸東南避鬱洲崩浪大於山張帆拔柁無  
歸處重來海口豎降幡全家北過長淮去長淮一  
去幾時還誤作王侯邸第看收者到門停奏伎蕭

條西帝嘆南冠老婦今年頭總白淒涼閱盡興亡  
迹已見秋槐隕故宮又看春草生南陌依然絲管  
對東風坐中尚識當時客金谷田園化作塵綠珠  
子弟更無人楚州月落清江冷長笛聲聲欲斷魂

殿上行

殿上雲旗天半出夾陛無聲手攀直有 旨傳呼  
召集賢左右公卿少顏色公卿繇來畏廷議上殿  
叩頭輒心悸吾丘發策詘平津未斥齊人慚汲尉  
先生侍從垂金魚退直且上庖西書况今慷慨復



遑惜不爾何以乘朝車秦涼盜賊雜風雨梁宋丘  
墟長沮洳降人數部花門留抽騎千人桂林戍  
至尊宵旰誰分憂挾彈求鳳高墉謀老臣自詣都  
詔獄逐客新辭鳩鵲樓先生翻然氣填臆口讀彈  
文叱安石期門將軍鬚戟張側足聞之退股栗吾  
聞 孝宗宰執何其賢劉公大夏戴公珊夾城日  
移對便殿造膝密語爲艱難如今公卿習唯唯長  
跪不言而已矣黃絲歷亂朱絲直秋蟲跼曲秋雕  
起嗚呼拾遺指佞乃史臣優容愚慙 天王仁

過錦樹林玉京道人墓

并傳

玉京道人莫詳所自出或曰秦淮人姓卞  
氏知書工小楷能画蘭能琴年十八僑虎  
丘之山塘所居湘簾棊几嚴淨無纖塵雙  
眸泓然日與佳墨良紙相映徹見客初亦  
不甚酬對少焉諧謔間作一坐傾靡與之  
久者時見有怨恨色問之輒亂以它語其  
警慧雖文士莫及也與鹿樵生一見遂欲  
以身許酒酣拊几而顧曰亦有意乎生固

爲若弗解者長歎凝睇後亦竟弗復言尋  
遇亂別去歸秦淮者五六年矣久之有聞  
其復東下者主於海虞一故人生偶過焉  
尚書某公者張具請爲生必致之衆客皆  
停杯不御已報曰至矣有頃迴車入內宅  
屢呼之終不肯出生悒悒自失殆不能爲  
情歸賦四詩以告絕已而歎曰吾自負之  
可奈何踰數月玉京忽至有婢曰柔柔者  
隨之嘗著黃衣作道人裝呼柔柔取所攜

琴來爲生鼓一再行泫然曰吾在秦淮見  
中山故第有女絕世名在南內選擇中未  
入宮而亂作軍府以一鞭驅之去吾儕淪  
落分也又復誰怨乎坐客皆爲出涕柔柔  
莊且慧道人画蘭好作風枝婀娜一落筆  
盡十餘紙柔柔承侍硯席間如弟子然終  
日未嘗少休客或導之以言弗應與之酒  
弗肯飲踰兩年渡浙江歸於東中一諸侯  
不得意進柔柔奉之乞身下髮依良醫保

御氏於吳中保御者年七十餘侯之宗人  
築別宮資給之良厚侯死柔柔生一子而  
嫁所嫁家遇禍莫知所終道人持課誦戒  
律甚嚴生於保御中表也得以方外禮見  
道人用三年力刺舌血爲保御書法華經  
旣成自爲文序之緇素咸捧手讚歎凡十  
餘年而卒墓在惠山祇陀菴錦樹林之原  
後有過者爲詩弔之曰

龍山山下茱萸節泉響琤淙流不竭但洗鉛華不  
洗愁形影空潭照離別離別沉吟幾迴顧遊絲夢  
斷花枝悟翻笑行人怨落花從前總被春風誤金  
粟堆邊烏鵲橋玉孃湖上蘼蕪路油壁曾聞此地  
遊誰知卽是西陵墓烏柏霜來映夕曛錦城如錦  
葬文君紅樓歷亂燕支雨繡嶺迷離石鏡雲絳樹  
草埋銅雀硯綠翹泥浣鬱金裙居然設色倪迂画  
點出生香蘇小墳相逢盡說東風柳燕子樓高人  
在否枉拋心力付蛾眉身去相隨復何有獨有瀟  
湘九畹蘭幽香妙結同心友十色箋翻貝葉文五

御氏於吳中保御者年七十餘侯之宗人  
築別宮資給之良厚侯死柔柔生一子而  
嫁所嫁家遇禍莫知所終道人持課誦戒  
律甚嚴生於保御中表也得以方外禮見  
道人用三年力刺舌血爲保御書法華經  
旣成自爲文序之緇素咸捧手讚歎凡十  
餘年而卒墓在惠山祇陀菴錦樹林之原  
後有過者爲詩弔之曰

龍山山下茱萸節泉響琤淙流不竭但洗鉛華不  
洗愁形影空潭照離別離別沉吟幾迴顧遊絲夢  
斷花枝悟翻笑行人怨落花從前總被春風誤金  
粟堆邊烏鵲橋玉孃湖上蘼蕪路油壁曾聞此地  
遊誰知卽是西陵墓烏柏霜來映夕曛錦城如錦  
葬文君紅樓歷亂燕支雨繡嶺迷離石鏡雲絳樹  
草埋銅雀硯綠翹泥浣鬱金裙居然設色倪迂画  
點出生香蘇小墳相逢盡說東風柳燕子樓高人  
在否枉拋心力付蛾眉身去相隨復何有獨有瀟  
湘九畹蘭幽香妙結同心友十色箋翻貝葉文五

條絃拂銀鈎手生死梅檀祇樹林青蓮舌在知難  
朽良常高館隔雲山記得斑駁嫁阿環薄命只應  
同入道傷心少婦出蕭關紫臺一去魂何在青鳥  
孤飛信不還莫唱當時渡江曲桃根桃葉向誰攀

悲滕城

悲滕城滕人牧羊川之濱雨工矯步趨其羣河魚  
天上從風雲去山一尺雷殷殷寺前鐵鐸多死聲  
日暮雞犬慘不鳴城上掌事報二更鬼馬踏霧東  
南行鼓音隆隆非甲兵吁嗟龍伯何不仁大水湯

湯滔吾民城中竿瑟不復陳縞帶之價高錦純路  
骨藉藉無主名葬者死生俱未明悲滕城滕城訛  
言晝夜驚百尺危巖浮車輪海民投網獲釜鐺巫  
兒赤章賽水神溝人匠氏脩防門

打水詞

北河風高水生骨玉壘銀橋堆幾尺新戍雲中千  
騎馬橫津直渡無行迹下流湍悍川途開吹笳官  
舫從南來帆檣山齊排浪進牽船百丈聲如雷雪  
深沒髀衣露肘背挽頭低風塞口相逢羨殺順流

船急問來時河凍否溜過湖寬放插平長年穩望  
一帆輕夜深側聽流澌響瑣碎玲瓏漸結成篙滑  
難施櫓枝折舟人霜滿髭鬚白發鼓催船喚打冰  
衝寒十指西風裂吁嗟河伯何涇涇白楫如雨終  
無聲魚龍潛逃科斗匿殊耐鞭杖非窮民官艙裘  
酒自高卧只話篙師叉手坐早辦人夫候治裝明  
日推車冰上過

再觀打冰詞

官催打冰不肯行座船旣泊商船停商船雖住起  
潛聽冰底有聲柁牙應桅竿旗動吹南風舟子喜  
甚呼蒙衝兒童操艇爭跳躍其氣早奪馮夷宮砮  
如蒼崖崩巨石錡如戈矛相撞擊滄如雲氣騰虛  
空颯如雨聲飛淅瀝河伯娶婦三日眠霜紈方空  
張輕烟忽聞裂帛素娥笑玉盤銀甕傾流泉別有  
蛟鮪還未醒沉魚浮藻何隱隱上冰猶結下冰行  
視水如燈取冰影冰輪旣碾相催送三千練甲皆  
隨從激岸迴湍冰負冰白龍十丈鱗鱗動自古水  
嬉無此觀披裘起坐捲簾看估客兼程貪夜發却

愁明日西風寒枕畔輕雷殊不已醉裏扁舟行百里安得并州第四弦彈徹冰天霜月起

雪中遇獵

北風雪花大如掌河橋路斷流澌響愁鴟饑雀語  
啁啾健鶻奇鷹姿颯爽將軍射獵城南隅軟裘快  
馬紅氍毹秋翎垂頭西鼠煖鴉青徑寸裝明珠金  
鵝箭褶袍花溼桐酒駝羹馬前立錦靴玉貌撥秦  
箏瑟瑟鬟多好顏色少年家住賀蘭山磧裏擒生  
夜往還鐵嶺草枯燒堠火黑河水滿渡征鞍十載  
功成過高柳閒却平生射雕手漫唱千人勅勒歌  
只傾萬斛屠蘇酒今朝彷彿李陵臺將軍喜甚圍  
場開黃羊突過笑追射鼻端出火聲如雷回去朱  
旗滿城闕不信溝中凍死骨猶有長征遠戍人哀  
哀萬里交河卒笑我書生裋褐溫寒驢箬笠過前  
村卽今莫用梁園賦扶杖歸來自閉門

梅村集卷第六 終



